

A' Bhanrigh Mairead air a naomhachadh

Chaidh A' Bhanrigh Mairead a dhèanamh na **Naomh** leis a' Phàpa Innocent IV ann an 1250. Bhiodh an Eaglais Chaitligeach a' comharrachadh fèis an Naoimh

Mairead, Banrigh na h-Alba air 16 Ògmhios, ach chaidh an latha atharrachadh gu 16 Samhain ann an 1972.



Naomhachadh

Bidh an Eaglais Chaitligeach a' naomhachadh corra neach. Tha pròiseas ann airson seo agus gu h-àbhaisteach cha thòisich e gu co-dhiù 5 bliadhna an-dèidh dhan neach bàsachadh.

Tha grunn ceumannan ann mus tèid cuideigin a bhàsaich a ghairm na naomh.

'S e fear de na ceumannan gun tèid beatha agus obair an neach a sgrùdadh. Feumar fianais a chruinneachadh a tha a' sealltainn gun robh beatha an neach **naomh** gu leòr agus math gu leòr.


Ann an ceum eile feumar co-dhùnadh an do thachair mìorbhail air sgàth 's gun deach ùrnaighean a dhèanamh ris an neach an dèidh dha bàsachadh. Ma thèid mìorbhail a dhèanamh mar fhreagairt do ùrnaigh, do chuid, tha seo a' comharrachadh gu bheil an neach air nèamh mu thràth, agus le sin gun urrainn dha iarraidh air Dia gun tachair rudan. Mar as trice, feumaidh fianais air dà mhìorbhail a bhith ann.

Vinneag Charnegie ann an Eaglais Abaid Dhùn Phàrlain, le Sir Noel Paton.



Tha ceithir mìorbhailean co-cheangailte ri Mairead

Tha am mìorbhail as aithnichte a tha co-cheangailte ri Mairead mun Bhìoball aice. Bha an leabhar air tuiteam ann an abhainn agus nuair a chaidh a thoirt às an uisge cha robh milleadh sam bith air. Bha seo air fhaicinn mar mhìorbhail. Tha an leabhar air a thaisbeanadh san Leabharlann Bhodleian ann an Oilthigh Oxford.



Ghairm am Pàpa Innocent VI gun do thachair dara mìorbhail nuair a chaidh boillsgidhean solais fhaicinn a' tighinn bho thuama na Banrigh Mairead.



Ann an treas mìorbhail, a rèir aithris, dh'fhairich Rìgh Alasdair III, a mhàthair, abachan, easbaigean, sagartan agus uaislean fàileadh cùbhraidh nuair a chaidh dust na banrigh Mairead a thoirt às an talamh. Bha iad air cruinneachadh aig Abaid Dhùn Phàrlain airson seo fhaicinn.



A rèir aithris thachair an ceathramh mìorbhail nuair a bha an t-eileadram air an robh dust na Banrigh Mairead ga ghiùlan a' dol seachad air tuam an duine aice, Calum. Gu h-obann, dh'fhàs an t-eileadram agus an dust a bha air cho trom 's nach b' urrainn an luchd-giùlan a thoirt nas fhaide agus chuir iad sìos e. Chaidh guth a chluinntinn a thuir nach bu chòir an dust a ghiùlan na b' fhàide gus an rachadh tuam Chalum fhosgladh agus an dust aigesan a thogail leis an aon urram. Dh'òrdaich Rìgh Alasdair III a bha an làthair gun rachadh tuam Chalum fhosgladh sa bhad. Chaidh an càraid a thiodhacadh còmhla.

Nuair a tha neach air a dhèanamh na naomh, tha an corp aige air fhaicinn mar rud naomh. Bha ceann Naomh Mairead air a chumail ann an taisealan mar seo. Tha an taisealan air a chòmhdach le seudan agus meatailtean prìseil.

